

Basef Ifimba Pol Nanda'ef Fagi' Fagafe'ma Timotii

Basef bandafi Pol nagi' nanda'ef fagafe'ma Timotii

1:1-2 Pol nanda' basefa Timoti ma God noloma
Krais Jisas mogatopalopana

1:3-2:26 Pol na'ipa Timoti ma nond'a' maol Godi
andeande' datima

3:1-17 Esis Kristen sundalutu banagesa sogame'
akafimi nimaguf akutaifi ma epes hiasi so-
gosambala basef Godi

4:1-8 Pol na'ipa Timoti dindinipa nowalipasa
basef Godi datima niganifelisa sonda' waf
bu'wafi

4:9-22 Basefa Pol nanda' kot faloma basef aku-
taifi

1:2 Ae' Pol anda' basef fafe'mago ina' Timoti, ae'
okom magamagailinai. Ina' nahapifa God dei'
nataga nogame ae'inai. Okom Godi atom dei'
ape aposel Jisas Kraisi. Basef Kraisi endilisifi atif,
naso'apa ambal namili apa' magape sisihipama
anini. Ae' a'i amom biam motopalopena dowaf
mowa' banagaina, ea' muti uwahipina monda'
nembel ine'imbili bepe sa'ombel.*

Apa' ina ambagofawagofa basef Jisasi, owa'

3 Esis ihase ae'asi saila waf Godi, dei' ae' wapani
ailaf. Ea' malogol gagape opaf ae' nomoni ina
gihimba'me anef waf awafi anda'afi, owa'. Beten

* **1:1-2** Ef 1:1; 1 Ti 1:2; Fl 3:5; Ap 23:1

ae'ani owamb alip dondol ae' okom mapomena anifela God.

⁴ Ae' okom mapoma ambif fagaluwi naep ine'ipi, okom mohafel a'owa' a'i ata' efo'o itilina sonehe endilisi.*

⁵ Ae' okom mandanda'ma hapif ine'ini, inimba endilisini, ina baso'amini, owa'. Hapif inimba fowa' nali' napoma iha'mena ine'ikwi Lois kwaloma ma'mena Yunis. Ea' egawa endilisi, hapif inimba dei' napoma ina' wapani.*

⁶ Fowa' ae' awamona lagofa balaga ine'igai ma God nagase'ena hiahaom fasimi ananimi. Ea' dei' a'i esa'ma nomonas ine'isi ma okom mogapoma hiahaom amamba fasimi magapoma ine'i, si'i sugufapula nif fagandif lu'wif.*

⁷ Ambal bu'unai God nagaso'apanai ina nonda'apa ombal mogahapai, owa'atin. Anen naso'apa waf afamba mugalutu banagepamafi ma ukup pigapigaila anis daias mugumafi alop ape'ipi andeande!.*

⁸ Ina' owa'i ambal aola nigai'ipasa basef Dembinai apa'inaia. Ea' owa'i ambal aola ae' wapania, owa'atin. Ae' anda'kalabusi, epen dembinaii. Ina' nefai' banagami Godi ma banagena nefai' nimanimi nelome ogawalapa basef bu'wafi ananifi.*

⁹ God nofa'apa mutanimai mogape andeande!. Anennofalapa amam nematawa ananipai atepa mogape be'epa hilili!. Ina okom mapoma waf bu'wafi apa' manda'afi nofalapa, owa'atin. Okom ananimi atom maimailapa nofalapa

* **1:4** Ap 16:1 * **1:5** 1 Ti 4:14 * **1:6** Ro 8:15 * **1:7** Ro 1:16

* **1:8** Ef 2:8-9; Ta 3:5

natopalopapa dowaf. Fowa' dambadamba ina dei' nanda' itap, ata' owa', Jisas Krais naso'apa okom apa' natopalopapa dowaf.*

10 Apa' dei' nogota ata'e Krais Jisas nafi'i nofa'apa motanima magape andeande'i, anen nataga alihina ea'. Dei' maol ananini God natopalopapa dowaf nogowa' banagapa ea' nataga alihin. Krais Jisas nikila' banagami magapoma ga'i, ea' basef bu'wafi Godi fihimba'mapa ambal lagape andeande' lifilafii.*

11 Anen nali' nanda'e apoma maol inimba egawalapa basef fasifi ma epes hiasi. Ae' aposel God nasapa'e agawalapa basefi, ae' tisa dembiwai anda' maol Jisasi.

12 Isimba atis dei' efa' akafimi amamba. Apa' ae' ina ambal aola amamba, owa'atin. Ae' egawa aman anamba agahapifanai. Ae' egawana endilisi anen banagonai ma nugumafi hiahaom hiami moloma epes hiasi ananisi hi'ilas ae' agaso'anas lagof ananigufi. Ea' isimba sope bo'wes andeande' sefe' sotagama nemaf afamba lu'wafi fegataga.*

13 Basef ifimba fasifi hilili'i ina' nagame'eme malogol ae'agili, basef ifimba si'ianol ametal fasini ma nigihimba'mena waf fasifi negawalipa epesafi. Ina' nihapifa Jisas Krais endilisi ea' okom mimilana nenda' waf na'amba nihapila basef ifimba tatala'if.*

14 Nimafi basef ifimba bu'wafi endilisifi God naga'se'enaef lagof ine'igufi ma nigimafie. Ambal

* **1:9** 1 Ko 15:55-57; Hi 2:14 * **1:10** 1 Ti 2:7 * **1:12** 1 Ti 1:10; 1

Ti 4:6; 6:3; Ta 1:9, 2:1 * **1:13** 1 Ti 6:20

bu'wali Godi neape nomona apa', notopalopena numafina ma maol inimba.

¹⁵ Ina' negawa epes hiasi sagape itap lu'upa Asiai, saloma amom biam Figelusi Hermogenes sakwahowe safe'.*

¹⁶ Ae' andabetena Dembinai ma ata' nogati Onesiforus naloma wambota ananisi uwahipis. Dei' main, dondol nanda' okom ae'ami mape andeande'. Anen ina ambal aola ae' ape anda' kalabus, owa'atin.

¹⁷ Anen nafi'i Rom nanda' maol lu'wani nala' nolaome, nagatolowe.*

¹⁸ Ae' andabetena Dembinai ma nogati anen uwahipina nemaf afamba lu'wafi. Anen natopaloche nimaguf hiafi wambel ambalemba Efesus, isimba ina' negawas andeande' a'owa'!

2

Ina' nepe si'i aman soldia bu'winai nanda' maol Kraisi

¹ Nogame ae'inai, dondol ina' nepe banagena ma Kraisi Jisas notopalopena dowafa banagami amamba nagaso' apa' magape sisihipama anini.

² Basef hiafi ina' name' agawalapefa nogohnaep epes hiasii, ifimba newalapefa anom amam gawaimi mogogawa basef andeande'i, ma muga'ipa anis daias datima.*

³ Ina' nendape banagena a'owa' si'i aman anamba soldia nindalutu banagena nindaila Kraisi Jisas. Nefa' nimanimi amamba neloma afa' anofa soldia ananifai ma maol inimba.

* **1:15** 2 Ti 4:16 * **1:17** Ju 21 * **2:2** 2 Ti 1:8, 4:5

4 Aman anamba nagape si'i soldiai, ina na-hapila maol naninani, owa'atin. Nandanda' maol inimba soldiai fasini atina na'i dembinai soldia ananinai okom muga'i maol ananini.*

5 Na'amba atin, aman ami nondopambema noloma anis nogasagihifi, nondaila waf afamba esis sagasagihafi. Ama nikila' nogofa' hiahawes isimba fasisi sasagih sikila'ma sogofa'asi. Apa' anen i'i owa' nigi'ma waf afamba sagasagihafi andeande'a, atiasi ina nofa' hiahawes isimba, owa'atin.*

6 Aman nanda' maol lu'wani aofi ma nugumafiaf andeande'i atiasi nili' nogofa' gwa'aisi aof afambai nikila' anis daias.

7 Ina' okom mondapoma basef ifimba aga'iefi. Atiasi dembinai nondogamena okom ine'imi, ea' negawa basef ifimba hiafi kofagefa.*

8 Dondol ina okom mopoma Jisas Krais, anen naga' ea' notanima nosafel wapani. Anen wambota atamba Deviti, si'i aga'iasa basef bu'wafi Godi.*

9 Ae' awalapa basef ifimba fasifi. Isimba atis dei' sa'i ae' auwai, sase'e akafimi mamimami awami. Aho' sanda'e anda' kalabus wapani. Apa' basef Godi ina fanda' kalabus fape, owa'atin endilisi.*

10 Ea' ewa' banaga okom ae'anai ma egalutu banagewe dondol egatopalopa epes isimba God nogosaho'as ea' ananisii. Ae' a'i God notopalopa esisa nofa'as sogotanima ma Krais Jisas soloma mogogala'i banagami magape lifilafii.*

* **2:4** 2 Ti 4:8 * **2:5** 1 Ko 9:7,10 * **2:7** 1 Ko 15:4,20; Ro 1:3 * **2:8**
Ef 3:1,13; Fl 1:12-14 * **2:9** Kl 1:24 * **2:10** 2 Ko 4:11

11 Apa' mundahapifa basef ifimba endilisifi sisihif.

"I'i endilisi apa' a' maga' malomana, bola apa' mosafel mope namepa molomana wapani.*

12 Apa' i'i mope banagepama mogofa' nimanimi hiamima, anaf dao' mope si'i king dembipai molomana. I'i mogowa' alafugahana ma, anen wapani anaf nowa' alafugahapa.*

13 I'i apa' mi'i apa' alipipai milana, ma owa' mugailanai, basef ifimba ape'ifia, ea' apa' hapaipai. Apa' anen atona nagaila basef ananifi endilisi datimaii. Ina atiasi nokwahif nombaso'ma anen, owa'atin endilisi."*

Amom manda' maola God endilisii, agof amamugufi fataga fandawalap naep Godi

14 Dondol ina' nesa'ma ukup asasipi ma basef ifimba. Ni'ipas banagambela naep Godi, ipa' ina pi'i basef pepa'ef pelomasa basef mamimami, owa'. Waf afambai ina fetopalopas kwasakwasala, owa'atin. Waf afamba atiasi fegaham-bombaga isimba sogame'afi.*

15 Ina' nenda' maol Godi banagambela negataga aman nanda' maol endilisii, ma ambal ine'ili ina aola maol inimba, owa'. Nenda'as na'amba ma God okom bo'oma ina' ma nigai'i basef ananifi usi'if endilisi.*

* **2:11** Mt 10:33 * **2:12** Ro 3:3-4; Nam 23:19; Ta 1:2 * **2:13** 1 Ti 6:4; Ta 3:9 * **2:14** 1 Ti 4:6; Ta 2:7-8 * **2:15** 1 Ti 4:7

16 Ina' nindihi'ama basef awafi. Ifimba ina basef Godi, owa'. Basef amambai atiasi monda' esis sogafe' ufia'w anamba aunai ma sogowa' alafugaha God.*

17 Basef asasifi awafi atif atiasi afetaga lu'wif si'i ilambeh awami, monda'as motaga lu'um endilisi. Tisa asasimi biam Himeneus naloma Filetus manda' waf afamba, maga'i basef mamimami wafimi.

18 Amam amamba mololama basef endilisifi ea' ma'ias ma'i, "Apa' motanima mosafel ea', ina ata' motanima mosafel wapani, a' owa'atin."

Basef ifimba atif amom mahambombaga ukup banagapi anis sagahapifa Godi.*

19 Apa' dei' God nawa olaf banagafi ea', dei' fape. Olaf afamba anif amef failaf faga'i na'amba fa'i, "Dembinai nogawa andeande'ma epes isimba ananisi." Ea' anif wapani fa'i, "Epes mamahisa saga'i agol Dembinaii, a' sondakwaha waf awafi."*

20 Ipat lu'utai nomon dis amamba hiami esis sanda' kapa fasini gol o silva main mogogala'i sanda'ami. Apa' anom sanda' lawah sanda'am, anom sanda' itap sanda'am. Anom sanda'ama maol fasini, si'i sando gwa'aisi saga'as. Apa' anom sanda'ama maol awani falafini, sagala alapitami.*

21 Ea' dei' epen ami nekwha waf afamba awafi ma nepe bo'wen hilili', inimba atiasi nepe si'i dis isimba sanda' maol bu'wani atinasi. Ea' Dembinai notopalopan nepe hilili' nenda' maol ananini.

* **2:16** 1 Ti 1:20 * **2:18** Nam 16:5,26; Jo 10:14; 1 Ko 8:3; Ais 52:11

* **2:19** 1 Ko 3:12 * **2:20** 2 Ti 3:17

Ea' anin nendandombola nenda' maol naninani bu'wani hiani.*

²² Dondol ina' nendafa'ma ukup amamba awasimi magataga ma amam amamba sa'umii. Nenda' maol bu'wani banagena nihapifa God nigaila waf usi'ifi feloma okom mogamogaila anisafi. Ea' nila waf opaf fogape sa'umbili, negaloma epes isimba opalef fagape bo'walef hilili' sogofala Dembinaii.*

²³ Apa' ina' newa' alafugama basef amamba mamimami awami dowadowafi ma epes isimba ukup magaso'asi gawa akasi. Dei' main, ina' negawa ea', basef ifimbai atif fagawalapa ukup mamimami wandafumi ma'i mandahihianamai.*

²⁴ Aman anamba nanda' maola Dembinaii ina ni'i anif basef wafifi nifitapef neloma anis, owa'i. Anen niti amam nematawa hiasi uwahipis noso'as opaf. Anen nondape dembinai tisa, nosopama okom numbutinai, nope nititi esis sonda'mana waf awafi.*

²⁵ Anen nuwalipas sa'ombel nisindi'amona nomonas nimanisa epes isimba sondaiwa'manai sogosambala basef ananifi. Anen nonda' maol na'amba notopalopas, anaf sombema nelelemba sogogawa basef endilisifi andeande!.

²⁶ Fowa' Satan nowalo'as isag ananigai, ma sagaila malogol ananigili. I'i esis sogawa basef ifimba endilisifi, bola ukup asasipi petaga alihip wapani ma sokwaha isag anamba Seteni sogafi'mai God.

* ^{2:21} 1 Ti 6:11 * ^{2:22} 1 Ti 4:7 * ^{2:23} 1 Ti 3:3; Ta 1:7 * ^{2:24}

1 Ti 2:4

3

Anefnemafakutaifi atiasi wafaunai hianai nan-inani notaga

¹ Ina' nendegawa, atiasi nimaguf akutaifi nimanimi awami endilisi a' motaga.*

² Nimaguf ifimba epes a' ukup pepoma esis atis, ea' ukup pindatiti moni mais asasisi a'owa', sosa'ma agof asasigufi atogof, sonda' du'waniga, sonda' epes findiwasa God. Ea' sosambala basef mamasasi ahasas asasisi. Ina atiasi sinifela Goda waf fasifi, a'owa'atin. Sosambala waf fasifi hilili'i.

³ Ea' ina atiasi ukup pipila anis daias, owa'. Ina atiasi sokwaha waf awafi anis daias sanda'masafi, owa'atin. Atiasi esis ina ukup pese'asa migimigaha siga'i basef awafi, owa'atin. Ea' sonda'i'ipama anis daindaiasa waf awafi. Esis ea' ukup pi'i esis atis ina atiasi sumafi alop asasipi andeande', a' owa'atin. Sohambombaga epes isimba bu'wasi, sowa' alafugah sondaiwa'ma waf bu'wafi.

⁴ Ea' sonda' alipisi asasisi sofe'ma lagof bousii. Ea' esis kwafalis sila waf awafi asasifi atef, ukup pepoma esis atis si'i dambesi. Ea' nomonas sisila dagala naninani aunai a'owa' ma alop asasipi atop. Ina ata' ukup pi'i God, a' owa'atin.*

⁵ Epes isimba atiasi sohapila waf Godi alop atona asasinai ando' atogon, apa' ukup asasipi nomon sondaiwa'ma God sowa' alafugaha banagami ananimi. Ina' nindihi'ama epes isimbai.*

⁶ Anom amam amambai mandambaho' nimanis mafe' magi'ma nematawa awamba

* ^{3:1} Ro 1:29-31; 1 Ti 4:1

* ^{3:4} Mt 7:15,21; Ro 2:19-20; Ta 1:16

* ^{3:5} Ta 1:11

nomonas owa' sogapaowa andeande'ia mawis ifagw awaugwi, ea' mola'ata nomonas awausi. Nematawa awambai waf awaufi fanda' nomonas awausi nimanis a'owa'. Ea' ukup awaupi pesafema awami mamimami mahondo'awa.

⁷ Nematawa awamba dondol wanda' maola ogofa' basef, apa' ina ogawa basef kofagefa endilisifi, owa'atin.*

⁸ Fowa' Janisi Jambris manda' naumbih maloma Moses, mowa' alafugahana. Na'amba atin dei' epes isimba sanda' naumbiha basef endilisifi sowa' alafugahef. Ukup asasipi ea' aowasip endilisi a'owa', ea' hapif asasini sambaso'am atin. Esis ina sahafilif endilisi, owa'atin.

⁹ Apa' waf afamba amamifi ina fataga lu'wif a'owa', owa'atin. Dei' main, atiasi epes hiasi siti waf gawa akafi amamifi si'i fowa' gani sagati waf afambai gawa akafi ma amam amamba Janisi Jambris manda'afi.

Ina' nihapila basef Godi tatala'if

¹⁰ Apa' ina' nafe' nagaloma ae'i, nagame' basef ifimba aga'ipasef ea'i. Ina' negegawa fe' ae'anii, ma basef hiafi kofagefa ae'afi. Ina' negawa ae' ahapifa God banagewe, dondol a'ipasa basef ananifi sa'ombel, okom ae'ami ina wandafum, owa'. Ina' negawa ae' okom magamagaila anis daindiasi, alutu banagewe efa' nimanimi.*

¹¹ Ina' negawa waf awafi hiafi esis sanda'meaf ae'i, ma akafimi amamba egefa'am walemb ambalemb wanelemb Antioki Aikoniam a Listrai.

* **3:7** 2 Ti 2:25; Eks 7:11,22; 1 Ti 6:5 * **3:10** Ap 13:50; Ap 14:5,19;
Sam 34:19

Ina' negawa hiahaom nimanimi sanda'meam egefa'ami. Apa' Dembinai natagwahowe ma hiahaom amamba hiami nimanimi.*

¹² Aho', epes ami soloma Krais Jisas sisihis sogapani ma sogaila waf Godi, bousi asasisi atiasi sonda'as kwapete'as.

¹³ Ea' amam awami maloma amom magambaso'ami atiasi mombaso'ma epes hiasi. Ea' aman anamba aunai nombaso'ma amom wapani. Ea' waf amamifi atiasi fetaga awef endilisi a'owa!*

¹⁴ Apa' ina' nihapila basef ifimba nefafe'ef naghapilifi. Ina' negawa apa' amam nematawa mamahepama magawalipina basef ifimbai.*

¹⁵ Ea' ina' negawa isimba wapani. Fowa' ina' ata' awani negawa gawa fasini ma Buk Baibel hilili'i ea'. Buk akwamba la'ifi'wi ma kogase'ena gawa fasini neloma nomonas fasisi ma ina' nighapifa Krais Jisasa God notopalopena nofa'ena nigatambilil.*

¹⁶ Ambal bu'unai Godi atona nasa'ma nomonas amom profeti manda' basef ifimba hiafi fagape Buk Baibeli. Basef ifimba fasifi ma fegaso'apa gawa, figihimba'mapa waf awafi ma mogakwahef, a figasindi'amona fe' ape'ini, figawalipapa ma mogolafa waf usi'ifi.

¹⁷ Basef ifimba fanda'apa epes Godi banagepa la'ifipa endilisi, ma monda' maol hiani fasini ananini.

4

* **3:11** Mt 16:24; Jo 15:20; Ap 14:22 * **3:13** 2 Ti 2:2 * **3:14** Jo 5:39; 1 Pi 1:20-21 * **3:15** Ro 15:4; 2 Ti 2:21

Ina' newalapef endilisi basef Godi

¹ Anaf Jisas Krais nowaloga epes hiasi dei' ata' sagape namisi, soloma isimba sagaga'i wapani. Naep Godi naloma Krais Jisasi, dei' a'ipina banagambel a'i Krais Jisas anaf notaga nondawalap alihina naep hiasii ea' nope Dembinai ma anamba anen nagala'ambemagoma. Isimba atis dei' a'ipina dindinip,*

² Ina' ni'ipasa basef Godi atapina. I'i nemaf afamba esis sondandombola sogame' basef, dao' ni'ipasef. Apa' i'i nemaf mamahefa esis owa' sondandombol some'efa, ea' diamaso, apa' ina' ni'ipasef atin. Ni'ipasefa fegatalogofa basef ifimba baso'afi. Ni'ipas dindinipa sogakwaha waf afamba awafi asasifi. Ea' nefela ukup newa' banganas, niwalipasa waf awanafi sa'umbilifi atef.*

³ Anef nemaf fegataga, atiasi asondaiwa'ma sogofa' basef usi'ifi Godi, a' owa'atin. Ea' a' sila ukup asasipi atip sofa'ai anom tisa hiami asasimi, ma mogai'ipasa basef ifimba esis isimba ukup pa'i sogame'ef aligah asasigahii.*

⁴ Ea' sowa' alafugaha basef endilisifi seme' basef amamba mamimami falafumi wafimi.

⁵ Apa' ina' dondol nomonas sope sogawa alihisa nigmafi alop. Nemaf afamba nimanimi mogatagamena nendape banagena nenda' maol newalapa basef fasifima esis amam nematawa sogololama Godi. Nenda' maol inimba ma negatopalopas, nenda'an endilisi hi'indalan.*

Pol na'i, "Dei' maol ae'ani na'i ahi'ilan."

* **4:1** Ap 20:20,31; Ap 10:42; Ro 14:9-10 * **4:2** 1 Ti 4:1; 2 Ti 1:13

* **4:3** 1 Ti 4:7 * **4:5** Fl 2:17

6 Ina' negawa, nogota atamba atataga ma sehe egaga'. Esimbel ae'ambeli ba'i kolo'olambel belo sehe ega', ma indilali egaso' God. Nemaffetaga ma ae' egakwaha itap apa'e.*

7 Ae' endepambema asagih afa' andeande'. Ae' ahapifa Krais banagewe, asagih andeande', dei' ataga alol.*

8 Dei' ametal hiahawes isimba sasagih sigikila'i sogofa'asi isimba sandandombol sapome. Ametal alamba na'amba. Atiasi Dembinainofale ni'ipi ni'i, "Ina' aman nagape hilili'i."

Dembinai anen aman hilili nogawalogasi ma nemaf afamba. Nemaf afamba lu'wafi atiasi anen nese'e ametal alamba. Ea' ina neso' ae' atowe, owa'atin. Anen noso'asam isimba epes mamahisa ukup pipila anen notaga nondawalap sogatolonai.*

Anifbasef du'wanif

9 Dei' ina' ulal nifi'mai ae' kwafalis.*

10 Dei' main, Demas okom ma'ima'i waf itapafi isimba atis a' nak wahowe nafe' Tesalonaika. Kressens nafe' itap lu'upa Galesia, ea' Taitus nafe' itap lu'upa Dalmesia.*

11 Dei' Luk atona nepe nalome. Ina' ne'wa Mak nolomena nifi'i nehapomeana. Dei' main, ande-ande'ma anen nogatopalope ma maol Godi.*

12 Ae' asapa' Tikikus nafe' Efesus.*

13 Ina' nigafi'i nifa'mai saket anamba launai anamba akwahona na'ihi Troas ipat Karpusi.

* **4:6** 1 Ti 6:12 * **4:7** 1 Ko 9:24-25; Re 2:10 * **4:8** 2 Ti 1:4 * **4:9**
Kl 4:14; Ta 1:4 * **4:10** Kl 4:14; Ap 15:37-39 * **4:11** Ef 6:21-22
* **4:12** Ap 20:6

Anamba ina' nindifa'mianai. Ea' anom bukifah ae'ami wapani nifa'miami, buk amamba sanda' agwafih mafisim sanda'am sanda'awai. Awamba nindifa'miawai atin nifi'i endilisi.*

¹⁴ Aleksander aman nanda' brasi, nanda' megahahe endilisi. Anaf Dembinai nogwamana akafimi anen, mondahama waf anen nanda'meaf ae'i.

¹⁵ Ina' wapani solawaina ma aman anamba. Anen natalogofa basef ifimba afa'ifi a'owa'!.*

¹⁶ Ali' agwa basefa kot atamba esis sanda'meatai, ea' ina anin epen atitin nalutu nalome nemaf afamba natopalope, owa'atin. Epes ae'asi hiasi sakwahowe. Ea' andabetena God na'amba, a'i ina a' okom mopoma waf afamba awafi asasifi ma sagakwahowe nemaf afamba anda' kotebi, owa'!.*

¹⁷ Apa' owa', Dembinai numafii ape ea' nase'e banagami. Isimba atis dei' awalapa basef fasifi a'if la'ifiwi endilisi ea' epes isimba hiasi owa' Ju-daisi sogogawa basef Godia, dei' same'ef hi' alas. Ea' God nelefate ma malogol mafin anamba lu'unai laion.

¹⁸ Atiasi Dembinai nelefate ma waf afamba awafi hiafi esis sonda'meaf ae'i, ea' atiasi nofa'e itanima nohapone epe anamba God nagala'ambemagoma gani heven nugumafiasa. Ae' a'i banagami mogogala'i mondapaona dondol lifilafi. Endilisi.*

¹⁹ Ina' nese'ago dagala ae'ani ma Akwila noloma

* **4:13** 1 Ti 1:20; Sam 62:12; Pro 24:12; Ro 2:6 * **4:15** 2 Ti 1:15

* **4:16** Ap 23:11, 27:23; Dan 6:22 * **4:18** Ap 18:2; 2 Ti 1:16-17

Prisila, ea' esis isimba wambota Onesiforusi.*

²⁰ Erastus ata' napani atin Korin. Ea' Trofimus aowas nanda'ana akwahona napani Miletus.

²¹ Ina' ulal nifi'i kwafalis. Na'amba ina' nepo-mai nemaf afamba fufin lu'wani nagaluwafi. Yubulus naloma Pudens a Linus a Klodia esis alipisi Kristen isimba hiasi sanda'mepago dagala sandagalalamago ina'!

²² Ae' a'i Dembinai nope nolomago ambal fasili ine'ili ea' notopalopepa dowaf nowa' banagaipago. Ea' ma'uf.

* ^{4:19} Ap 19:22, 20:4

**Basef Bu'wafi Godi
The New Testament in the Mufian Language
Nupela Testamen long tokples Mufian long Niugini**
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 25 Aug 2024 from source files dated 31 Aug 2023

b0cff915-4005-598f-9bbc-38b1e35d47b1